



9. marts 2012

UPA 2012/129

Inatsisartut suleriaasianni § 33 naapertorlugu aalajangiiffigisassatut siunnersuut imaattoq saqqummiuppara:

UKA2012-imi Naalakkersuisut inuusuttut 25-it inorlugit ukiullit qanoq amerlatigisut ullumikkut ilinniagaqalernissamut suliffeqalernissamulluunniit piareersimannginnerat pillugu nassuiaammik saqqummiussinissamik peqquneqarnissaannik Inatsisartuni aalajangiiffigisassatut siunnersuut. Tamatuma saniatigut inuusuttut uninngaannalernissamut aarlerinaateqartunut Piareersarfiup ataani suliniutigineqartunut aaqqissuussaasumik siunnerfilimmillu ilanngunneqarsinnaaneranut periarfissat nassuiaammi misissorneqassapput.

(Inatsisartunut ilaasortaq Akitsinnguaq Olsen, Siumut)

Tunngavilersuut:

Akilerartarneq atugarissaarnerlu pillugit isumalioqatigiissitap isumaliutissiisutaani qupperneq 27-imi ima allassimasoqarpoq: ”Meerarpasuit meeqqat atuarfianni misilitsinneq angusimanngilaat massa taanna ilinniariaqqinnissamut piumasuseqalersitsillunilu tunngavissaliisaraluartoq. Amerlasuut ilinniarnermik aallartitsisarput, ilatigut takornartaanngitsumk kingusinaartumik, ilinniakkanilu amerlanerpaani ilinniakkanik unititsiinnartarneq annertoorujussuvoq. Amerlaqisut meeqqat atuarfiat qimattarpaat naammattumik iliniaqqinnissamut toqqammavissarsinatik. Ukioqatigiit 50 %-iisa missingi meeqqat atuarfianiissimanermik saniatigut ilinniagaqarneq ajorput.”

Inuusuttunut taakkununnga, immaqa meeqqat atuarfiannilluunniit atuarnerminnik naammassinissimanngitsunut Piareersarfiit pilersinneqarput. Piareersarfiit ilaatigut ilinniagaqalernissamut ilitersuillutillu inuussutissarsiutinik ilinniagalinnut suliffimmik misiliinermut tunngatillugu ilitersuillutillu Piareersarfiit piginnaanngorsaaneermik ingerlataat pikkorissaasarnerillu ingerlattarpaat. Taakku saniatigut ineriartortitsineramik ingerlatsineq kiisalu sanaartornermik atuarfittut ilusilinnik sammisaqarnerit ullumikkut annertuumik aallunneqarput. Piareersarfiit tulluusimaarutigisariaqakkatsinnik tapersersortariaqakkatsinnillu annertuumik suliaqarput.

Piginnaanngorsaaneq taamaattoq Kommuneqarfik Sermersuup nittartakkami quppernerani ima imeqartutut nassuiarneqarpoq:

- sannavimmiinneq
- suliffimmik paarsaqarneq
- ullaakkut makissinnaaneq

- imminut akisussaaffigisinnaaneq

Inuussuttut amerlanerusut meeqqat atuarfiannit naammassinermik kingorna ilinniagaqarsinnaanermut piginnaasanik amigaateqarneq pissutigalugu ilinniagaqanngitsoornissaat pinngitsoortinniarlugu sukkasuumik iliuuseqarnissaq, iliuusissallu kingusinnerpaamik 2012-imi aallarteriissasut Akileraartarneq atugarissaarnerlu pillugit isumalioqatigiissitap kaammattuutigaa. Tamanna isumaqatigaara. Isumaqaqpungali taamatut iliuuseqartitsinissamut tunngatillugu aalajangertinnata sukumiinerusumik ilisimasaqqaarnissarput.

Taamaammatt inuussuttut 25 inorlugit ukiullit qanoq amerlatigisut ullumikkut ilinniagaqalernissamut suliffeqalersinnaanermulluunniit piareeqqanngitsut pillugit Naalackersuisut nassuiaammik saqqummiussariaqartut isumaqaqpunga. Tamatuma saniatigut inuussuttunut uninngaannartussanngornissamut aarlerinaateqartunut Piareersarfiup ataani suliniutissap aaqqissuunnissaanut tulluussarnissaanullu periarfissat misissornissaat nassuiaammut ilanngunneqattariaqarpoq.

Naalackersuisut pineqartoq pillugu misissuineramik aallartitserernissaat ilimagaara, taamaammallu kissaatiga suliamut ingerlareersumut ilanngutiinnarneqarsinnaanera naliliutigaa.

Siunnersuut Kim Kielsen-ip uangalu inuussuttut 25-it inorlugit ukiullit suliffissaqarnissaannik qulakkeerinninnissaq pillugu siunnersuutitsinnut ilassutaallunilu tapertaavoq.

Siunnersuutip aningaasatigut allaffissornikkullu pisortanut kinguneqaatissai:

Siunnersuutip siunertarisaanik piviusunngortitsineq nassuiaatip allaffissornikkut suliarineqarlunilu kingorna attuumassuteqartunut tusarniutigineqarnissaa pissutigalugu Namminersorlutik Oqartussat isumalluutininik atuisariaqalernissaat pisariaqalersissavaa. Nutserinissamut, suliamik ingerlatsinissamut il.il aningaasatigut isumalluutininik atuinissaq pisariaqalersissavaa. Ataatsimut aningaasartuutit ukioq naallugu atorfeqarluni 500.000 kr-imik akissarsiaqartup ukiup affaanit sivikinnerusumik sulineranik naleqassasut missiliorneqarpoq.

Illuatugaagulli inuussuttunut suliffinnik ingerlatsisinnaanermik ukioqartunut uninngaannalersunut suliniutit aallartinnerisigut siunissami suliffissaqanngitsunut ikiorsiissutit pisortanit isumagineqartut annertuumik annikinnerulersinnaanerat ilimagineqarsinnaavoq.

Inuussutissarsiutinik ingerlatsisunut innuttanullu kinguneqaatit

Siunnersuutip innuttat amerlanerusut sulisinnaalernerat sulisartutullu inuulersinnaanerata ilimanaateqarnera pissutigalugu inuiaqatigiinnut pitsaasumik kinguneqaateqarnissaa ilimagineqarpoq.

Inuussutissarsiutinik ingerlatsisunut imaaliallaannarluni kinguneqaateqassanngilaq, ungasinnerusorli isigalugu sulisartut piginnaaneqarnerullutillu sulisinnaassuseqartut amerlanerulernerat inuussutissarsiutinik ingerlatsisunut iluaqutaassaaq.

Innuttat imminnut napatissinnaanerulernimmikkut iluaquserneqassapput, tamannalu imminut tatiginerulernermik imminullu ataqqinerulernermik nunatsinnut Kalaallit Nunaannut iluaqusiissaaq!

Qujanaq!